



ESTD. MARCH 2008
JANUARY 2023

Hinna Vâk

AN ORGAN OF THE TANGPHAI PRESBYTERIAN CHURCH



KUMTHAK CHIBAI BUKNA

- Kumthak Kipak-um
- Khanglaite Leh Nunnawp
- Sungkuan Ah Pathian Nasep

To:

If undelivered please return to: - Manipur Area Office,
P.O. Box - 107
D. Phallian,
Churnchandpur - 795128
Manipur, India

Editor : Rev. S. Lama Vaiphei, Executive Secretary

Joint Editors : Rev. P.B Zosapthara, Consultant
: Rev. K. Jama Vaiphei
: Rev. Th. Samuel Vaiphei
: Upa Lalminsang
: Upa S. Lalpi
: Pi Chinglalven, Secretary, CKNP
: Upa Genminlun, Secretary, CKKP

Business Manager : Pu Lalbiaklian, A/S Office.
MPCS Office D. Phailian
P.O. Box 107 CCPur-795128 Manipur
Phone No. +91 9089623251
Email - *ehinnavak@gmail.com*

Kum khat lak man : Rs. 100.00

A man pia nuam leh a la thak nuam ten Business Manager kianga hiatsak ding.

A SUNGAH THU UMTE

1. Editorial	01
2. KOCHUAM HUANG	02
3. KUMTHAK CHIBAI BUKNA	04
4. KUMTHAK KIPAK-UM	05
5. KHANGLAITE LEH NUNNAWP	07
6. SERMON	
a) Khrista Chu Banggual In La Ngai Em?	10
b) Lawng In Lut Hitu Aw	13
c) Sungkuan Ah Pathian Nasep	15
d) Mani Kitodel	18
e) Lal Thak A Piang Tai	20
f) Gualpha Pen	23
7. LA LEH A CHANCHIN	25
8. KKP HUANG	28
10. KNP HUANG	30
11. REPORTS	
Myanmar Gam Mission Nasepna Reports	31

Hinna Vâk ah thu kisua zosia hi Editor ngaidan a hi suak puai

Pauchapna Thupi:



1. Kumthak 2023 ei puitungtu Pathian kiang in kipak thu gen hitiu. Kochuam tin te'n thagau lam maljawlna dawnna kum ah i neithe chiatna ding un pauchap hitiu.
2. Damlona zâlkhun ah kumthak maitua te a ding in pauchap hitiu.
3. Hinna Vâk hi kum 15 tiang ting thei ah ei puitu Pathian kiang in kipakthu gen hitiu in, lamzang tak ah a chia zawm zel theina ding in a buaipitute a ding in dawn hitiu.

KHAWVEL HI HUNG NUAM DEU DEU DING A HI

Kumthak kipak um ei musak ah malsawmna tincheng ah ei vuk zui i Lalpau chu lopina chang hen la, simtu zosia Lalpa Jesu minin kumthak chibai ka hung buk hi. Covid panglo Khristmas i mangzo thei tau ah kipak a um takzet ah, Covid panglo in kumthak lawm in covid panglo hinkhua i mat zawm zel tak ding uh i ki-dawisak hi.

I Office staff te lak ah mi pakhat thugen chu ka lungthim in a châm zing ah: *“Khawvel hi hung nuam deu deu ding a hi”* ti a hi. I chanchinbu teu leh i pulpit teu a pat i hiat zing ma ma uh chu khawvel hi a se ta law ta, a tawp dingkuan a hi tai ti a hi laiin, khawvel hi hung nawp deu deu ding a hi ti hi hiatthiam haksak tak le a hi maithei hi. Natna a pung ah, thina maksak tak tak leh kido thuthang te'n a luadim zo ta, zankhat thu ah mangthai ziang thei dinmun in i kihe bawk ui.

Lelangkat lam a chun, mi hi a ching gawp tau ah kuaman kido le a nuam ta puau. Mitin mai hin kichamna a dawu ua, Russia President Vladimir Putin hinle neuclear galvan hi a gen sekna chu a mang ngam tak tak puai. Zia sang ah chun, i gamsung lam ah nidang ah keng ah chiana gam a khan gari mang in nuam takin i chia tau ah, mi chan ding ah i gel teu kha ei un i chang ua, mi nek ding ah i gel teu kha ei un i ne zel tau a; mi â ding ah i gel teu kha ei uh â a hung hi tai. Kum 10 masang khawvel kha vak en le chun, tuhun a nawp tak zia hi kichian in tin, tunung kum 10 zaw leh banggual tuk in thil a hung kisang danglam diam ti ngaitua kham a hi.

Khawvel hi nuam deu deu in tin, a nawpna tawh mangthai khawm ding a hi ti hia in kumthak 2023 sung a hin kumtuang dai ding bang hemkhat bek bawldawk gua hi tiu.



Kochuam Huang

- December 11, 2022 (Pathianni) ah khan nitak dak 2 tuam in Rev. T. Ngama chun kumtuang gam eila zawtsan tai. Ama hi nat lâwkna nei a hi pua, Sunday School kikhawp pel ah, Kochuam sum audit a bawl lai ah kipuk ah, Hospital delpi himaleh tung manlo ah bei a hi. A vuiliamna programme hi 12/12/2022 ni'n a umna Molnom khu'a'n Rev. ST

Khuppa'n a mang ah, Biakin leh Thân lam in Rev. Kamkhotinthang Neihisial in a mang hi.

- Kum 2022 Mizoram Synod Kikhawmpi chu Khatla Kochuam Biakin ah navak tak in 6-11/12/2022 sung ah khan mat zaw a hi tai. Zia Kikhawmpina ahin ei uh Provisional Synod ah sêm lai Mizoram Synod Pastor-te leh, ei uh Tangphai Provisional Synod ai-aw Palai – Rev. S. Lama Vaiphei leh Rev. Ngurthanmawia Sailo te a va pang thei u'i.

- Synod Kikhawmpi chun kum thak, kum 2023 apat Pastor-te umna ding siagual hin a siamlem hi:

<i>Min</i>	<i>Umna di</i>	<i>Induction neitu ding</i>	<i>Induction ni</i>
Pro. Pastor Minthianboi	D. Phailian	Rev. Lalremliana Colney	15.1.2023
Pastor S. Mangminthang	Guwahati	Rev. S. Lama Vaiphei	15.1.2023
Pastor H. Lamthianmuan	Dumlian	Rev. C. Lalrinliana	15.1.2023
Pastor Ph. Thianneilal	Delhi	Rev. P.B. Zosaphara	21.5.2023

Pro. Pastor kila thakte:

P/P Lunmuanthang	Lamka	Rev. Vanlalchhuanga	15.1.2023
P/P Pastor Lalgoulian	New Lamka	Rev. Nicky Lalremmawia	15.1.2023

HINNA VÂK

- **Revival Speaker-te kimatna:**

Revival Speaker-te'n December tha sung ah khan ziagual hin hun a lah mang u'i:

- 7-11/12/2022 - Tv. M. Sasang - Mualngat Kochuam (Crusade)
 - 24-28/12/2022 - Pu Kamzathang - K. Kawtlian Kochuam (Khristmas cum Crusade)
 - 24-26/12/2022 - Pu VK Thanga - Chongkhozo Kochuam (Khristmas cum Crusade)
 - 19-23/12/2022 - Pu Kamzathang - K. Kawtlian Kochuam (Crusade)
 - 14-17/12/2022 - Pu VK Thanga - L. Munlai Kochuam, Leilon (Nu leh pa Camp)
-

zia Jesu tui uain suak sakkhan la Insung, la hinkhua leh la masang hung theng danglam thei a hi ti hezing in. Then danglamna na chu a bawl zing nalai ah, zia thendanglamna na chu a nasep a hi ngal ah...

~Adrian Rogers

lawng chawl na mun ah lawng chu a bit in thamuan a um ma hi, himaleh zia mai ding ah chun lawng chu siam a hi puai.

~John A. Shedd

A zangaina'n a hun kep bit zawlona ding mun in Pathian chun hun kaw i puan tin, thil manpha leh lul tak la chan theina ding in thil dang zosia la chan le a ngai maithei a hi.

~Bernadette Devlin

KUMTHAK CHIBAI BUKNA

Pathian puihuaina in kumthak i galkai kit tau. Zia tiang ei puitungtu Pathian chu pakin um ta hien.

Kum lui liamta ah khan Pathian dawilo lam i la bawl sekte, i nasepkhawmpi leh lawilehpaite chung ah bawlkhial nei le um hitiu. Ziagual ah i bawlkhialte kha limet ah mang in, zia kumthak ahin Pathian dawigual bawl in, i umna mun taphawt ah thilpha bawl ding in kisinga hitiu. Kumthak ei puitungtu Lalpa Jesu min in Kochuam mi zosiate chibai ka hun buk hi.

*Rev. P.B. Zosaphara
Consultant,
Tangphai Presbyterian Church Provisional Synod*

KUMTHAK KIPAK UM

~Upa B.T. Khampu

Kangvai

Amasa'n Hinna Vâk simtu zosia Kumthak Chibai ka hung buk hi.

Zia thupi, 'Kumthak Kipak Um' ti hi zik ding ah ka kingaitua lai Lin ka lungthim ah betdai theilo thupi dang hung kilang chu 'Kumthak Lungngai Um' ti a hi ziak in, zia lam chu le thîl zing kawm in ka hun zik a hi.

Kum hi damsung hun sawt leh sawtlo tena pawimawpenkhat a hi. Chanchin (History) suina ah le matchak pawimaw ma ma a hi. Pathian in kum a guanggal dan hi mak tak leh bukim tak a hi thung hi. Kum khat sung in hunbi chaum chuam; Phalbi, Nipi, Chûk leh Khâl tite a um a. Ziate chu hun in a ban ban in a hung heidawk jel a, a kipatna a hung phak kit takleh kum khat ti a hi sek hi. A thak ah pan i lak jel theina ding ua Pathian ei guatpiak chu hi ngei in a.

Kum hi Pathian in phatna a vuk hi (Sam 65:11). Mihing â ding ah mamaw lei in ga

a sua theina ding in tui in a chapno sek hi. Kum siat kum, kum phat kum tena i nei kit u'i. Buaina, haksatna, sesiat (natural calamity) tun kum chu kum siat kum ti a hi sek a, hunbite a hi di gual chiat ah a tun a, maljawlna i dawn kum uh chu kum phat kum i ti sek u'i. Mi zosia'n kum pha tun ding i nuam chiat u'i. thuching in, 'a bul pat hawi chu a kimkhat zawsa a hi' a ti gual in kum hung thak chu phatakkcha mat it up chiat u'i. Ahinla, i duthusam gual un Kumthak Kipak-um ting zolo in kumthak lungngai-um a hung tung zaw sek hi.

Kumthak kipak um hung

tung hi kipak tak a i mat ua, maljawlna taksa leh thagau lam ah i dawn theina ding un bang gual ah pan thak i lak ding un a hi diam ti hi ngaitua kham tak chu a hi. Apostol Paul in, 'Pathian ngaisak hi lungawina tawh a hi chun lawkna nasa tak a hi (I Tim. 6:6) a ti a hi. Zia gualma chun Jawlnei Habakuk in le, 'theichang kung selthak lo in, Olive thingte'n ga sualo in, lo lai ah bu pianglo in,

gangualte chu le a huang ah kilawilo in, gankul ah chun bawng hawn pakhatcha le um talo maleh Lalpa ah chun kipak zing ing ka.' (Hab. 3:17-18) a tia. Ama sawlchak Paul inle, 'kei vang banggual in um lengle lungawi tak ah um dan ka he tai,' (Phil 4:11-12) a ti a hi. Lungawi tak leh kipak tak ah um chu Kumthak kipak-um tak ah mat tung theina lampi umsun chu a hi. Lalpa'n a thu maljawl ta hen.

~ i hawinapen hi, i hun chiasa ah i phatlonate leh bawlkhialnate haw phawldawk thak ah i kinawltua leh i kinaksaklo tua ziak ah hung pawt hilo in, i kipanpitua leh kitawsawttua phatleh hung pawtdawk sek a hi zawí.

~ Joaquin Phoenix

~ thil zosia hi hun in a hung theng danglam sek hi ti hi mi zosia ngaídan chu a hía, a diktak ah chun nang ma kha a theng danglamtu ding la hi zaw a hi.

~ Andy Warhol

~ la nutsiate sâng ah phazaw gamcheng la masang in a um nalai hi ti hezing in.

~ C.S. Lewis

KHANGLAITE LEH NUNNAWP

~Rev. Khuplemlal
i/c Leilon Pastor Bial

Thumapui: Tulai Khanglaite khawvel hi i et a hi chun, a pha lam ah chia nuamte a ding kawt liantak a kihawng ah, a se lam ah chia nuamte a ding inle kawt a kihawng kihawng kit a hi. Pi leh Pute khan “A phalam lampi chu a to hen, a selam lampi a hi leh chu a pheh hi” ati gual un, haksatak leh gimtak ah lamzawt sang ah chun nuam tak leh awl tak ah lamzawt theina chun mi a hîp zaw ma ma ding a hi. Malai ah i pi leh puteu khan nunnawp hi ala ngaisang ua, zu mun sa mun ah nunnawp hun amat uh leh kipakni leh kutni ah nunnawp hun amat uh kha a nunnawp nei uh a hi deu tangpi a hi. Tulai ah i khawvel uh hi a hung changkang tiat tiat a, Nunnawp leh limlawpna mun tampi hiatbe ding leh mu ding a tam ta khawp mai a hi.

Nunnawp leh Khristianna

Khristianna hi sapgamte ei hung puaklut piak in i ngai ua, amau tidan, bawl dan hi i ettawn uh a hita dia aw ti mai a bailam hi. Amau chawndan leh thilbawl zosia hi eimau culture ah puaklut i guat uh a hi mai ta dia aw tithei ding khawp in i um ua. Nunnawp zat chuam chuam i Khristianau tawh a kituak nam tile ngaitua in nunnawp leh limlawp nalam in tamtak i tai ua ngaitua kham a ting takzet a hi. Khristian khanglai Pawl member active

panna chi ahi leh hilo tel thiam a ngai khawp mai hi. Nunnawp chu a sevek hilo maleh a hun leh a mun telthiam a ngai khawp mai hi.

Bang hem Nunnawp chu?

I gam ahin nunnawp ti ah gen thei ding tamtak a um a, Kipawllimmna leh awllen ah i mat uh, Kut chuamchuam i mat teu, Party te, Picnic i titeu leh kipawlkhawmna chuamchuam, khawsungvengsung kipawlkhawna i guanggal teu hi huap thei in a. I khawvel uh a hung changkang

tiat tiat a, nunnawp tamtak i gam in muding a umta, State sawlkar a kipat in district – block leh khawsung level tiang in nunnawp mat ding hi a tamta khawp mai a hi. Gam chuam chuamte bawl dan leh chawndan entawn in Nunnawp chichuam chuam bawl dan chuamchuam le hung pawt zel din ginchak a um hi. I gam ah nam chuamchuam te hin le mani nam bîk a ding in pawl chuam chuam i din ua, zia pawl chuam chuam te ah kipat chun le nunnawp zat chuam chuam, nunnawp/gualnawp zat chuam chuam i nei chiat uh a hi.

Khanglaite leh nunnawp

Khawnglai thathaklai leh thisan satlai a ding ah chun nunnawp leh awllen te haw hi thil thakla umtak leh khiakla um tak a hi. Khawvel ah cheng leh khawsa i hi ziak un nunnawp hi i pawimaw mau mau a hi. Nunnawp zosia ahin pan ding a h'em panlo ding tih chu mani dawitena a hi ngei a, maleh nunnawp ah i panna ding hun leh mun tel thiam hi a pawimaw khawp mai hi. Kochuam leh i Khristian zilsakna tawh

kituaklo nunnawp ah pan hi khanglalten bawlo a hawi khawp mai. Chuleh kochuam nibik pawimaw hun ah Nunnawp thil ah kisuk buailo hi thil kilawm leh i bawl ding uh a hi. Nunnawp hi thil sia a hi pua, a mangtu ah zil a hi, nunnawp ah pangtute hi i chitthei a pawimaw ma ma a hi. Nunnawp in a kenkhawm thil tamtak a um a, apha leh a sia a kengkhawm hi. Sualna lampi ah khanglai tamtakte i va pukzawt nau, zu mun - sa mun ah i va vaklut khak zawt sek nau leh kinakna, gitlona lampi i va lut khak zawt sek nau hile, i nunnawp mat ziak uh hiin a kilang sek hi. Zia haw zosia hi ngaitua zing kawm ah Nunnawp hi i thil thiam, i mat thiam a pawimaw mama a hi. Thilpha hi ding ah hukdam Khristian khanglai pawlte hin Nunnawp i mat dan ua hin i nu leh pa a lungawi nam? Kochuam mittunglo in zia nunnawpte haw hi i mang mai em? Ti hi i kingaituana hileh a dawum hi.

I kochuam hin hun pawimaw leh nibik pawimaw taktak I nei a, zia bak ahin kochuam leh khanglai in activities tamtak

HINNA VÂK

thipha hina ding I nei ua, zia hun tawh kituak ah nunnawp leh kipawl limna a um in le Pathian leh a kochuam hi ngai pawimaw zawk ding ahi. Kochuam hunbik leh pawimaw tawh kituak ah nunnawp a um in khawi ahem la um sek le? Nunnawp I mat teu hi I limpiu hem hiloleh I lawk piu? ti hile ngaitua kham tak ahi.

Khanglaite, Kochuam nibik leh Nunnawp

Kochuam hin nibik pawimaw taktak, Kumthak, Khristmas, Good Friday, Easter Sunday Pentecost leh a dang dang i nei sau sau hi. Kochuam mi leh Khanglaite haw hin zia nibik i nei teu hi nunnawp gual ah i ngai khak ua, i kochuam in nibik i neiteu hi nunnawp leh kipawllimna mai in mang zokhai tiu ti a lau-um a hi. Ni pawimaw i neiteu hi a ziak leh zal um vek ahia, zia ni pawimaw i matteu in a tup leh a ngim hephalo ah nunnawp gual ah i mat khak ding uh hi thil tizat um a hi. Chuleh Kochuam nibik leh hun pawimaw tawh kituak ah kochuam mite hin mani mimal ahiloleh sungkuam programme/nunnawp

guanggallo hi thil dawm um a hi. Khanglaite zia ni pawimaw i neiteu hi a nunnawp lam hilo ah, a lim-um lam zawk le hi diaklo a, taksa leh thagau ah i lawkpi theina ding pen ua mat ding a hi.

Thukhakna:

Zia khawvel hi a bei masia chu, Kochuam, Khanglai leh Nunnawp hi chu beilo ding a hi. Kochuam ah khanglaite hin Nunnawp hun leh ni ahin a chintawk hiat i thiam uh a pawimaw khawp mai hi. Kochuam programme sâng ah Nunnawp programme te ah hun i piak tamzawk khak ding uh hi i kiven uh a ngai a hi. Nunnawp leh kochuam ni pawimaw leh hun pawimaw ahung kituak hun ah i dawitelnau i matthiam uh a ngai hi. Zia hun a chun, Pathian leh a Kochuam lam ah hun la mang diam? Nunnawpna mun ah? tih ngaitua kham tak a hi. Chuleh Khanglaite leh Kochuam mipite hawn le kochuam ni pawimaw hun tawh kituak ah Nunnawp/programme siamlo ham hi tupthei leu hin a dawm um ma ma a hi.

KHRISTA CHU BANGGUAL IN LA NGAI EM?

[Matthai 22: 42]

*~Rev. Lalremliana Colney
i/c D. Phailian Pastor Bial*

Pathian hepina ziakin kum thak i galkai kit mai tau. Zia hun thak ei petu Pathian chu pâk in um ta hen. Ei un le kinepna thak tawh i lungthim Lalpa lam ah kawi in kum 2023 ah hin A dawigual ah i hinkhuate mang thei ding in ki singsa hitiu. Kum hung thak hin mi tamtak chun i taksa a ding ah thil phalo i chîn sekte hi nutsia gua in thutiam te a siam sek u'i. Zia gual ah mihing lam ah kisingsa ah i hinna thil pawimawlo leh eima ngei in taisan i nawpte hi chu taisan zel hitin, taksa hiselna hile i ngai pawimaw zel hi a pha ma ma hi. Taksa hisel leh thianthona hi Pathian dawi lam a hi ban ah ei a ding ah le a pha ma ma a, masawn zel le i tup ding uh a hi.

I Timothi 4:8 ah chun “Taksa kisawizawinahinphatchuamna a nei tho hi; Himaleh Pathian ngaisakna chu bang la lam inle a phachuam hi.” Tiin ei hil a. Kum hung thak ah hin lampi chuam chuam in masawna i nei maithei hi, himaleh zia zosia sang ah pawimaw zaw chu i hinna hin Pathian thil ah i kisingsak zing lai hin a pawimaw zawk ngaisaklo ah thil dang i kawi pawimaw zawk chun phalo ding a hi. Pathian i kawi pawimaw tak tak ding

chun i zui Khrista Jesu hi ei a ding ah bang a hi em? Kum thak ah hin i hinna puitu ding ah Khrista hi dawi tak tak ding i hui em? Zia dawtna pawimaw tak dawnhuna chu Khrista i mu dan ah khan sau takin a kinga a hi.

Zia thu simtu lak ah hin mi chini um thei in a. Zia mi chi nite chu Khrista ngaisangtu leh Khrista ngaineptu te a hui. Kum 2000 val hial mite'n Khrista chanchin hi a la gen tau. Khenkhat chun ngaidan

HINNA VÂK

a siam fel tau a, khenkhat in vang ngaidan ala siam fello in tuni tiang hin zia dawtna hi dawt a hi zing hi “Khrista chu banggual in la ngai em? Tih hi. Zia dawtna hi dawtna dang sang ah dawnhu haks a hi diaklo in ka hiai. I khua Village Authority te a h’em i MLA a h’em mi minthang kua hitaleh banggual in la ngai em ti chu kidawng talehin la ngaidan chu gen thei ziang mai ding in ka gingchai.

I Lalpa Jesu Khrista chungchang ah hin le ngaidan siam haks a um in ka hepua i. Ama panpitu hi a h’em ama dodaltu hi a h’em ah ngai a hi ziang hi. Zia khawvel hin mi tam zawte mizia hi chu i kiang ah umte zil in a danglam chiat hi. I mi ngaisan zawng leh mi lian te kiang ah i um dan leh i mi ngaisan beklote kiang ah i khawsak dan leh kampau hi a kibanglo sek ma ma hi. Zia khawvel ah i mi ngaisan leh ngainep hi chu a la pawimawlo khawp mai, a daih sawt pua zia i damsung mai hile a daih puai. Hun chawmcha sung a ding ahia chawmlokal in a bei kit mai sek hi. Lal Jesu i ngaidan a hileh vang chu mi zosia a ding ah pawimaw leh

mamaw a hi ziang a, thi nung khellam tiang a ding ah umzia nei a hi. Ziakiakchun “Khrista chu banggual in la ngai em?” ti dawtna hi nang leh kei a ding ah a pawimaw chiat ah dawnhu ngei ngei ding a hi.

KHRISTA CHU KUAPEN A HI HIM HIM EM?

Zilsaktu a hi:

Zilsaktu lopi tak a hi. Tang chung ah a thugente kha vak sim kit tiam u (Mat5:1-12; Lk 6:20-23) tuni tiang in khawvel ah thu kigen lopipen a hi zing hi. Khristiante bep in a ngai pawimaw leh lopi a hipua, Khristian hilote’n le Jesu ziltilna hi a ngai thupiu ah India nam Pa Mahatma Gandhi khan le Mat 5:1-12 hi a hinna kaihuaitu’n a mang sek hi a tiu. Zia khawvel mithiamte thugen ngaitak sang in, ziltiltu Jesu kengbul ah minute 5 bep um hile thanawp um zaw in ka hiai.

Doctor a hi:

Manipur ah hin Doctor thiam tamtak a um hi ti ka hia, a hi vang in zia doctor te hin a specialized na lam uh a hilo chun treatment ei pe nuam puau a, doctor ten damdawi

diklo a piak zia ah dam sang ah natbe zawte le gen ding a um hi. Lal Jesu Khrista'n a etkawl thiamlo lam natna vei him him a tuakkha puai. A hun lai ah natna chitin veite khan a zuan ua, Ama'n ala sudam ti bible ah i mu'u. Tuni tiang ah hin chu sukdamna na chu ala sem zing a hi.

A thina a mawpawtu ten Jesu a mu dan uh:

1. Pilat chun a gitlona ka mupuai a ti tawp hi.
2. Juda Iskariot, chawp ah ama matsaktu ngei khan le Thiampu Lalpen masang ah chia in, dawkan ah a paisa dip va kawi in, "mawna neilo thisan ka matsak zia ah hin thil ka bawlkhial tai" ti in Jesu a ngaidan a gendawk hi.
3. Rom sepai hotu ngei khan le, kraws ah a khetden laitak un Jesu chu "Zia mi hi Pathian chapa a la hi tak tak hi" a ti'i.
4. Marka zik ah khan thagaubuaq, thitha ngei khan le, "Jesu, Pathian chungnungpen chapa", tiin a kiko a hi kha.

5. Pa Pathian ngei khan le Khrista hi banggual in a ngai em ti a hung puangdawk a, "Zia hi ka chapa dawitak, Ka kipakna ma ma chu a hi," ti in.

6. Pathian chun A chapa thina a kigawl khate zosia chu, migilo a hilo dan hechiantu in a mang vek hi.

7. Tichun Khrista ngei chun, "Nanghaw thuakgim leh puakgit paw zosiate haw, ka kiang ah hung unla, keima'n ala chawldam sak ka, ka ngawngkawllung puau inla, ka kiang in zil un. Lungthim ah nunnem leh kingaitawm ka hi, tichun la thagau a ding un chawldamna mu'n lau. Ka ngawngkawllung a nuam in, ka puak le a jang hi" a tia.

Zia gual lawm ah hukdamtu lopi chu ngainep thei ding i hui em? Ei uh a ding ah a hinna petu hi ama a ding ah hin ve hi i piak kit thei sun hi mailo a h'em. Zia kum thak ah hin i hinna ah Pathian i chawihawi theina ding in A chapa changkhat neisun hi ngai pawimaw ah ngaisang thei ding in Pathian ngei chun ei panpi chiat ta hen.

LAWNG IN LUT HITIU AW

(Gen7:1)

*Rev. Vanlalchhuanga,
i/c Lamka Pastor Bial*

Tuipi kam ah chenglo maleuhin lawng ah chuang hitiu aw. Buaina leh haksatna tuipi chup phaklona hinna lawng ah lut hitiu aw.

Noah hunlai akhan mihingte chu a gilo ta ma ma ua, kipawngnekna in khawvel chu a luadim zo tai. Lalpa Pathian chu mihing a siam ziak ah chun kisik in a lungthim a na ma ma mai a, leilung apat mihing sukmanthai a nuam tai. Himaleh ama lau leh gin-um mi fel Noah chu a hezing a, hukdam a hitheina ding lampi a siampiak tai. Tuisanglêt sak ding a guat ziak in lawng siam ding in a hil tai. Tichun, Noah chun thumang takin lawng chu a siam ta, zia chu Noah'n kum 100 sung a Pathian nasepna a hi. Lalpa leh a Kochuamte'n sem ding ah mawpuakna ei piak sukpitin hi i Pathian nasep ding dan uh chu a hi.

Gua nasa takin a hung zu, tui nâk zosia kipat in tui nasatak mai a hung pûtdawk bawk a, tui chu a khang zel a, tangte chu a chupmang suak ta a hi kha, suakchat ding gua in tang ah te in kalto in, thingkung sang penpen lek ah te khan kal ngei in au, himaleh a kinepnau zosia chu chupmang vek a hi ta, lawng sung ah umte longal chu a leng un a mangthai tau hi. Noah lawng kha hukdamna umsun, Pathian guat umsun chu a hi.

Tuni ahin zia hukdamna lawng chu guanggal zinglai

ahia, kumtuang gawtna, Noah hunlai ah tuisanglet sang ah nasa leh huaisia zaw chu hung tung ding a hi. Hukdam ah la um theina ding Hukdamtu Lal Jesu a um ei vei. Ama chu hung bêl inla, ama ah chun kihumbitna a um hi. Zia lawng ah lut ding chun Noah gual ah Lalpa mitmu ah mi dik hi a pawimaw ngal ah....a haksat tuak na e, mihing a ding in hithei di gual a hi na diam le!

A qualification chu a sang ngal a! I ki-en ah, titna i nei paw ngal a, midang i en a, a

gitlonau be pi mu kit bawk ngal ua... Bangtin a hi diam le? Thikthusia Pathian a hinate i he ngal ah.... a dik ma a hi. Pawm in pawmlo lehinle haltum mai ding ah um, i masang chu gawtmun a hi. Himaleh Pathian hepina ziak in hing leh dam in i um a, a zanagaina ziak bep in sukmanthai in i umlo uh a hi. Zia i hina chu kipawm ah ama gin mai chu i thiamchanna ding chu a hi. Migilo thi ding Lal Jesu thisan ah silthian i hina hi Pathian mitmu ah midik i hinau chu a hi. I hina gual gual in ama'n ei pawm a, gitlona sim ah ama lam ah kilekitte chu midik a himai u'i.

Lal Jesu hukdamna huangsung ah i tu leh chate, i insung mite a um theina ding un nang leh kei hi a mawpawtu i hiu. Zia lawng chu la in ah, la insungkuante lak in siam in. Noah kiang ah, 'nang la lut ding a hi, la chapate leh la zi chuleh la chapa zite tawh le' a ti'i. Lalpa'n i insungkuan chiat ah mawpuakna ei pia a hi. 'Midang va limsak kin' tina hilo in, eima mit ah thingtum um chu ladawk masa phawtlo in i unau mit ah thing them um lakdaw chu haksa maithei in a.

Zia khawvel thiamna leh pilna nasatak, taksa leh thagau ah kidona nasatak kal ah hin la insung ah khan hukdamna lawng la huitupna em? Midangte a ding ah hinna khauhual thung ding chun i inkuan ah lawng ah i lut phawt a pawimaw nalawm lawm e!

Inkuan in Noah zal zo ah lawng ah lutsak a hi gual un, i sungkuan, Kochuam leh i khawtang a ding ah zal zawna tak, ganêktâk ding ah kawng bangkim ah i hindawpi a pawimaw nalawm lawm e!!

Lal Jesu'n a hun hukdam ta, a hun hia, sathau a hun nu a, a hung tepte ta kha lam, kilepsan ah zammang ding la hi tapuai. La hina gual gual ah midik ah pawm la hi tak ziak in det tak in suklîn guallo ding in Pathian na theitawp sua zing un (I Kor 15:58). Lalpa ah chun thawn ngai puan a. I kiang ah mite hukdam ding in hukdamna lawng siam in. Hinna khauhual thung un tuifawn in chupmang ding a hi tai. Lampi dik ah pui ding in nang leh kei tilo dang a um diak puai. La khut lo chu Lalpa'n khut dang a nei puai, la seplo chun kua dang in sem diak ding a hi em?

SUNGKUAN AH PATHIAN NASEP

(Joshua 24:15)

~ Pi S. Hawikim

Jubilee Church, D. Phailian Bial

Pathian in Kum 2023 damtak in ei musak kit ta, kipak um i sa, Pathian chu pak in um taken.

Kum a thak gual in lungthim thak i put uh a ngai hi. Kum beita a khan i kithada ziakin, thil phalo bawlkhakte, thu phalo genkhakte le i lah nei kha a hi maithei, maleh hun in achia liampi zota, ko kit theile ahi tapuai. I Bible chângtêl ah Joshua'n "Kei leh ka Inkuante'n vang Lalpa na bep sem ing kau, tia agen gualin ei un le tu kumthak ahin ningkum lam sangin ei ma mimal chiat in, I sungkuan inle phatchuam zawk gaw chiat leu hin, Pathian na i sep thei dan mawlcha ahin bul pat thak chiat gaw tai tiu.

1. Eima Sungkuan ah sungkuan tin in Lalpa na i sêm thei :

I sungkuan khawsakna ding ah i sep bangkim hi Pathian min in sêm chiat le hin, Pathian nasêm hi'i tiu. Nu pakhat an nekna kuang sawpsek tu chun le akuang sawpna mun ah "Zia tak ahin nisin in Pathian na thumvei ka sêm sek hi" ti ki zik atâk a, kuang a sawp sin

leh Pathian min in a kuang sawpna chu a sêm sek a hi. I sungkuan khawsakna a na chi chuam chuam sêm sek ihu a, Office kaite, dawr ngakte, school kaite, an huante, In sukthiante, puansawpte, vawk an piak, bu sep, thingpuak, tui khai, kigen kim seng puan a, i sungkuan a ding a phachuam na isep zosia te hi bangna hita leh gin um, taima leh kukal taka isep

ahi chun Pathian na sêm ihu. Chun, Nu te'n le icha teu ithei dan leh thiam dan tawk ah i etkawl ahin Pathian nasêm ihu a, Lalpa na lopitak sem i lahi zing uh a hi. I sungkuan in, i Insung ah Pathian min ah na i sep vek a hi chun kipak hi ti un, sungkuan le nuam ngei in a.

2. Sungkuan Insung kikhawp inei sek ahin i sungkuan in Pathian na i sêm a hi :

Pathian thu, i lungthim leh Thagau lam an, i nisin hinkhua ei kai huaitu ding i nekkhawm sek hi a lûl ma ma a hi. Sam 119:105 “La thu hi ka kengte a dingin thaumei ahi'n; ka lampi a dingin vak ahi” ti i mu, sungkuan in, Insung kikhawp nisin i matkhawm hin Pathian na i sepna lûl tak a hi ti hezing lehin, i tu leh chate Pathian a ding ah puihuaina matchak phachuam tak hingei in a, Pathian gindan te hung thiam intin uh, gitlo dona leh zawna matchak a hi dan te hung hethiam deu deu intin uh, Hinkhua limna leh thamuanna ahia, ziak a

chun nisin insung kikhawp mangtheilo sekte'n le nisin ah mangthei dingin panla chiat hitiu.

3. I sungkuan in thil piak ah Pathian na i sêm thei ui :

I sum leh paite, i bu leh bal te, Lalpa kiang ah pat i thil dawnte, ama kiang ah piakthuk kit hi sungkuan ah Pathian nasepna pawimaw tak a hi. Eima a ding ah i mat ma in Pathian a ding ah sawm ah pakhat bêk hin chu Pathian na sêmlo di hiu em maw? Sawm ah pakua i chang nalai a, sawm ah pakua apat inle Missionary chawpnate le i pe thei nalai hi. Chun, Anchangham nasepna hin le Pathian in nek di ei piak laisia chu Anchangham mang in ana i sêm thei zing a hi. “Dangka chu kei a ahi'n, sana chule kei a a hi, sepai honte Lalpa chun a tii,” Haggai 2:8 ah titu Pathian ahi ziaikin, la phuaktu'n le “Piak in Pathian chu lan zo ngai puan la” a ti kha. I sungkuan in thilpiak in Pathian na sêm zel hitiu. Piak in Pathian chu lan zo ngai

HINNA VÂK

puai tiu bangkim neitu a hi
ziak in.

4. Sungkuan ah Pathian na i sep theina kit chu Thilpha hi hih a hi :

Naupang leh piting in i
hi thei chiat chu midangte
chung ah thilpha hi hih a hi.
Thil lianpi tak leh langsal tak
hi a ngai diak pua, i hi thei
kham kham kha a pha vek a
hi. Lal Jesu'n le "Zia ka unaute
lak ah a neupen chung ah
la hiu kha le, keima chung
ah hi la hiu" atia. Pathian
chun Abraham kiang ah
nangma chu maljawlna hi'n
la (Gen. 12:2) atia, (Galatia
6:9) "Ziaziakchun, thilpha hi
chimchak puai tiu, i kithada
lo uh chun ahun tak in at
ngei ding i hingal un" ti i mu.
Thilpha i hi chun aga luak

ding um a hi ti Bible ah i mu
a hi. Chun (Jakob 4:17) ah
chun "Tichun, kuale thilpha
bawl ding he ngal ah, bawl
diaklo chu, gitlona bawl ahi"
ti i mu kit a hi. Thilpha hi di i
hiat chu neu talua leh tawm
talua umlo in, i sungkuan in
hi gaw chiat leu hin midangte
a ding ah banglam a h'em
bek ah maljawlna hi ngei in
ah. Thilpha hi di he zing ngal
ah i hilo ua chun, Pathian
huat zawng, gitlo a hi ngal
a. Joshua khan le ama leh a
sungkuante chun Lalpa na a
sep ding uh a gen gual ahin
ei unle zia Kumthak dawi um
tak Lalpa'n ei puitung ahin
lungthim thak in, i sungkuan
un Lalpa na sepna pan lathak
thei chiat dingin Lalpa'n a thu
maljawl taken. Amen.

Mi hun sawttak ah kipat ala hiatsa'u Khristian hilote sang in
Khristian a kimupi kawmteu chu tawh Inkuan khat gual in a um
ngal ziang thei u'i.

J. C. Ryle

MANI KITODEL

(Bible sim ding: Thilsiamthu 3:19)

~ *Evan. V.K. Thanga*

A masa'n zia tiang eipui tung tu Lalpa Pathian chu pâk in um ta hen! Tuni hin MANI KITO DEL, MANI KENG AH DIN ti thupi mangin chawmcha holim leu hin ka nuam hi.

Kochuam hung khangto zel in Provisional Synod tiang i tung to tau ah kipak a um takzet hi. Zia chu a hi zinglai in Synod i din zawna ding un Pathian bân ah sum a pawimaw hi. Pauchap pauchap ziang leu hinle paisa a umlo chun Khawmpi chu a thisa a hi. Sum neukhat a umleh a matna ding leh chawk ding hawl mailo a phai, a pawimaw naten loin. Eimi te hi chawk ding hawlte i hiu a, sum ah i kitodel zawna ding ua pawimawpen chu taimatna hi in kahiai. Taimatna ngaisang in mani kitodel gua in, taksa le thagau in sep ding hawl luai luai hitiu in, i sepgim lona hin bangma duchât da hitiu. Pastorte hileh Kochuam mite le Government lam a pat hihen lang Kochuam lam a pat te hitaleh, panpina zat chuam chuam umte mutheina ding bep in buai gaw puai tiu.

Tulai ahin zilna i hung ngaisang tau ah kipak a um ma ma hi. Hiatna neilo hi chu bengngawng leh mitthum gual mai a kihia, da-um tak chu a hi. Chuleh, degree sângtak vanei hi mite masang ah le mailletna ahia, i kochuam â ding ah pawimaw ma ma khat chu a hi. Maleh i Kochuam din zawna ding leh hat zawkna ding ah chun, a sep ah sep tam hin ga a

sua in eisu hing zaw diak ding in ka gingchai.

Kochuam te nasep ding pawimawpen chu Chanchinpha gen a hi. Chanchinpha gen i ti hin kam bep ah gen ding tina hilo in - i nisîn hinkhua matdan, i kichei dan, i kampau leh tawidan zosia ah gen ding tina a hizaw'i. Chuleh, gamthak nasepna hi i kochuam un i ngaikhawk mamau ah kipak a um hi. Zia

HINNA VÂK

chu a hi zinglai ah eima insung, kochuam leh khawtâng siam fello ah gamthim bep buaiپی زیانگ، a etkawlna ding banggual um a hi em ti ngaitua masalo, Pathian ah kimawk ngak ziang hi Ama dawidan hi kim diaklo ding a hi. Eimau lam ah mawpuakna leh bawl ding, neu in lian taleh Pathian in ei piakte hi gin-um tak leh titakna tawh bawl fel phawt leu hin Pathian in eimau tawh kituak, i zaw ding tiang uh leh i etkawl zaw ding tiang uh ei pe ma ma ding a hi. Eimau mawpuakna lam ngaikhawk thak in, Pathian mattâk ding leh muan tâk ding in i umna mun chiat un ala kisiam fel hi tiu.

Kochuam sung ahin nuak hat, thulo thu salo, zawl zawl ngai, maipha hawlina ding bep ah fel, a dang ah kilâk khalo um da hen lang, Pathian lam bep en ah Kochuam â ding ah kipumpiak hi ding gaw chiat leu hin Synod hi ding zo zel intin, puk zianglo ding in ka gingchai. Kochuam sum hi i piak ding dawl mipite'n hawitak in kipia henla, i pawimaw leh Office lam ah pat in kila kit zaw hen la, i kipunkhawmnau hi hât intin, malsawmna le hung hi ding in ka gingchai.

Kochuam ah mi tam hi a pha, nawp le a nuam hi. Ahinla mi i chial ah i puilût masang in eima insung, Kochuam leh bial sung chiat hi bel tâk ding in taksa leh thagau lam ah kisiam fel masa hitiu. Mi tamtak kitûplo tak hi sang in, bang lam lam ah ettawn tâk leh bel tâk hi ding gaw chiat hi tiu. Mi ettawn tâk leh etla kham ding in eimau theina mun chiat ah Pathian hia zing pum in theitawp sua in panla in kitodel gaw chiat hi tiu.

Pastor quarters haw hi a hawi leh hawilo deu le um intin maleh lungawi tak ah um dingdân kizil henlang, bialte'n a pawimaw haw enkai leu. Pastor khat quarters buai ah buai zing ziang, a lang a lang in i mualpho un kahiai. Zia sang ah chun bial sungin semtam hitiu in, a nai leh gamlat inle pastor bial ah umtei hileh, mani kitodelna khat hiding in ka gingchai. Semlo ah a ga hawl ah, ga tampi gasak ding ti chu kitodel ti thupi taw kikal deu in kahiai. Ziaziakchun, i sepna mun chiat un kitodel bep hilo in Pathian leh Kochuam te â ding in a tuang/a lawk deldaw gaw chiat hitiu.

Ka kipak hi.

LAL THAK A PIANG TAI

(Lk. 2: 8-20)

~ Rev. S. Lama Vaiphei
Executive Secretary

Thumapui

Thingtang khua a chun, khua hausa kitheng ziang inle bouruak nasa tak a siam thei sek hi. Lal thak kiti hin thuneinate, lalnate leh lopinate a ken ziakin thil ngaiven um tak ding dan chu a hi. Kum 5 term dinga MLA thak bawn i buaipi a hi chun, kumtuang ah i Lal ding chu a piang tai ti hi ngaitua ngai tak thupi chu a hi.

1. Jesu pian lai ah Juda gam ah lal Herod leh a masang ah lal te chun thuneina leh lal nan vai a hawm ua, mipite â dingin puakgik a hi. Israerl nam te chun zia gual haksatna apat a thil vung vung uh chu Lal thak messiah, David lalgam gual ah Pathian in a humbit, thamuang takah khawsak theina, namdang ten a sukbuai ngamlo lalgam kha a utchau ah a, zia chu Messiah ah kinepna a ti sek uh chu a hi.

Lalna leh thuneina kichu ziakin i gamsung hi a buai zinga, lalna leh thuneina chun hausakna leh lopina

keng khawm in i he bawk ua; zia thîlna a pat vang a chun buaipi tâk him a hi. Tulai a hinle, politician i tiu haw chu zia gual lungchang pute chu a hiu. Kochuam hin lalna leh thuneina enlo ah kingaitawmna leh thunuaigawlna mang ah kipumkhatna a buaipi ziakin politician ten a belcha sek zawu a hi.

Lal thuneina nuai ah muanna leh bitna a umlo takleh mipi chu a liangvai sek uh a hi. David leh Solomon te haw hun lai a khanle, lalna, thuneina, hausakna leh lopina chu a nei bep uh hilo

HINNA VÂK

in, le langkhat ah mipi ten muanna leh bitna a nei zia kun a lungmuang uh a hi. Muanna leh bitna panglo ah lalna leh thuneina mai in chu mipi a thamuansak thei puai.

Tu ah i gen Lal Herod te haw hun lai a hin mipite chun muanna leh bitna a neikhawm lo zia kun lal thak thangaina a lian ma ma a hi.

2. Jesu a hung a, chamna leh hepinan vai a hawm a, gitlo lakin a mite a hukdam ah, puakgik dawntu leh chawldamna a hi. Kingaitawmna leh thunuaigawl na tawh Pathian lalgam a din leh mite ngaidan tawh a kituak pua, lalgam din nailo gualin a ngai zing uh a hi. Judate ngaidan a chun thuneina sang tak kengin lalgam chu din leh hethiam ding a hui a. A hunlai ah mipite khan Lal melin a mu puaua, a lalgam chu tungdawk nawm nawm leh ti duthusam in a thîl tumkei ui timai ding hina.

A mite thîl dan kha a buai pi pua, a lalgam chu mihiam lungchang ah a din a hi zawi.

A ma lalna nuai ah kipelut zosia chu kichamna leh hepina in a enkawla, a gitlo teu ngaidam in, a puakgik uh a dawn zangkhai piak sek hi. Zia khawvel a hin gim genthei thuak ma leu hen kumtuang ah indet, kht ah saklo chu i nei ui ti ah zilsakna hi a zuitute ziang inle a hethiam puau ah Pilat kiang ah ka Lalgam chu zia khawvel hi a hi puai ti ag a gen kha a bengngawng bang mai ding a hi.

3. Tuni hin zia gual lal thak chu a hung piang tai kipak hi tiu. Lal thak kipakpitu chun a lalgam dindan ah i lungawi hi tina ahi pen mai hi. Lal Jesu'n lalgam a dindan hi la kipakpi thei em leh? Lal Jesu'n a din lalgam chu min i biang langkhat a bet leh a langkhat lam le daw ding ti a hi. Zia method chu mang in a hi Jesu khan Peter kiang ah: zia suangpi chung a hin ka kochuam chu din ing ka tin, mithi khaw kul kawtkhak inle nangzo puana a ti kha. Vangam chabi piang ka tin lei ah la kan uh chuh van ah le kan hin tin, lei ah la thap

uh chuh van ah le thap hina ti a hi kha. A thuneina kipiak dan uh hi a sang ma ma ah, zia thuneina mang tute chun a matdi dan chu kingaitawm leh thunuai gawl tak ah mat a ngai zel sek a hi.

Nang leh kei hinkhua a hin zia lalgam chu din ngei in i hiau em? Zia chun nang leh kei thamuanna leh bitna ei pe thei na em? Zia lalgam thuneina leh lalna kha chu kua tapo in le i dawit maitheia, maleh a namat dingdan laitak hi haksatna siamtu chu a hi. I hinkhuau a hin zia thaneina kha i namat zel sek nau em? Khawvel mite method kha i namat phat phat ualeh kochuam buai kiti kha hung piang sek a hi.

Ziagual muanna leh bitna ei pethei lal thak chu i nei ualeh, zia lalgam chu i mihing chanpi dangte haw hinle a chan ngei uh i dawisak uh em? Lalthak hin i thinlung uh a lua ah, i hinkhuau ah thuneina a chan tak tak a hi chun, ka

ngawngkaw! a nuam ah ka puak le a zang hi ti leh ka kiang ah hung unla hung zil un ti hi midang ten le a phatchuampiding un pesawn hi tiu.

Thukhakna

A liang na e maw! Van mi hung piang chu,

Bethlehem bawng in tawm a ngak hi;

A ma chu mihing leh Pathian a hi,

Lal leh Hukdampa hi a kawp (KLB 93).

Lal thak hung piang hi i thinlung zosiau in i lawp thei uh em? A ma lawp tute zosia chun lal thak thuneina chu mang in zia khawvel hi Lalpa leh Khrista gam suaksak ding in pan i lak ding uh a hia, thuneina i namat ding dan uh chu kingaitawm leh thunuai gawl kawm ah namat ding ti a hi. Tichun lal thak lalna nuai a chun thamuanna leh bitna a um khawm ah, kochuam te kilunggual leh limtang takin khawsa khawm thei ding i hiu.

GUALPHA PEN

“Zia chu ka lawmpa leh, ka gualpha chu ahi” (Solomon Lâ 5:16)

Gualpha hi khawvel ah maljawina thupi takmai khat chu ahia, maleh gualpha diktak hi a vang ma ma hi. Mi tamtak chun, la lawtin hun in hun kipakpi intin uh, maleh la damlo hun genthei ni ah hun umpi ding gualpha chu vang ma ma ding a hi. Zia khêl lam ah chun, la lawi tawmchate chun la thagau a ding hun ngaikhawkpi ding ahiu. Ahinlah, gualpha diktak khat ka hun kawkm nuam a hi. Ama chu, “pianpi unaute sang ah le ginum zaw a hi” (Thupilte 18:24). Ama chu hun zosia leh kumtuang tiang â ding ah la gualpha ding ah mansa zing chu a hi. Zia gualpha la hiat ding ah ka dawu chu Lalpa Jesu Khrista a hi. Ama chu gualpha pen ah lanei a hi chun kipakna diktak nei ding la hi!

1. Lalpa Jesu Khrista chu gualpha ma mawte a ding a hi:

Migilo i hi zia k un, Ama mamawpen chu eimau i hiu. I pianken ua thina natna vei ngawn chu i hiu. Gitlona zia k ah i leng ua thi i hiu. Himaleh Khrista chun zia thina kipat ah chu hung tandawk ding in a hung a hi. I pianken ua bat nasatak nei ngawn i hiu. Pathian kiang ah a man i piak zawlo ding bat nei ngawn i hiu. Himaleh Khrista chu i bat pe ding in a hung a

hi. I pianken ua siatna dim leh paimang ah um chu i hiu. I pianken dungzui un kumtuang hinna ding ah damna ding mun chu tungzo ngai ngailo ding i hiu. Himaleh i Lalpa Jesu chu mangthaite hukdam ding leh dam tak ah vangam ei pui tung ding in a hung a hi.

Khrista chu khawvel ah ahung ah migilote a hung hukdam longal leh lampi dang mawng mawng umlo a hi dan la muchian a hi (1 Timothi 1:15). Ama chun

a hilo theilo a hi zia ah ahung bawl a hipua, maleh ama dawi gual in a hepina, lainatna leh khawtuana zia kin a hung tandawk a hi. Zia chu a hi gualpha diktak chu! Jesu Khrista gual ah gualpha dang him him a um puai!

2. Lalpa Jesu hi a tawp umlo ah gualpha chu a hi :

Gualpha diktak chu a thugen sangin a thil hi in a kilang zaw sek a hi. Khrista'n a gualte a ding ah thilpha a bawl gual hi kuama dang in a bawl puau. A Pianken ah Pathian himaleh, eih sik in mihiam gual in a hung kisiam ah mihing a hung hi a hi. Eimau sik in zia khawvel gilotak ahin kum

33 hial a hung khawsa, mite muda leh nawl in a um ah, lungngai leh lungthimnatna in a pumdim a hi. I sik un kraws ah thina huaisiatak chu thuak dingin a hung kipia, tichun i sik un a thi a hi.

Zia thilte haw hi Jesu'n a bawl a ngai puai. Himaleh bangma'n hung hukdam theilo a hi ti a hiat zia kin leh a hepina zia ah hung in thi dingin a hung kipia a hi. Zia hi hiatthiam zaw guallo, a gualpha hina chu a hi. A mudate a ding ah thi ding chu kua'n mi mu zo ding a h'em? Maleh zia chet chu a hi Jesu nasep chu. Ama gual ah gualpha a um ngai puai!

Zia article hi "Pathian tawh kitawn" ti lekhabu, J.C. Ryle in a zik, Pastor Mc Giulianthang in vaiphei pau ah a ledaw ah kipat lakdaw a hi.

Gual leh pai phatak gual in khenkhat a kisiam kawm un; a hinla, gualpha leh gin-umte chu, pianpi unau sang in le a gin-um zaw kit u'i.

Thupilte 18:24

MALTA TUIKUAL HAW AH

~ *Upa B.T. Khampu*

Pu B.T. Khampu hi Pu (L) Jamkhawlet Buite leh Pi (L) Thiamkhawniang te kâl ah gil ah ga maljawlna a panina hi in 1948 kum in Naupanglawn khua'n ala piang hi. A pian nung tha khat/ni zaw in a nu leh pate'n khawthak Sanglel a zawtpi ngal ui (Zia chu Sanglel khua kizat kum a hi).

A neulai ah kipat in, ama hi athiamzilna dawi ma ma leh ngaisang mi ala hi'i. Ahinla, zia gam tuam ah chun School kaina ding a um puai. 1959 kum in a paneu (L) Pauzathang in T. Phaikhawlum ah M.C.O Mission School Private in a hawng a, Vaiphei Simpat Bu ala zilzo hi. Zia chule KUKI-HMAR kido zia ah sunzawm theilo in kum ni a chawl kit hi. Kum 1962 in zia School chu M.C.O in a hung la ta, Pawl 6 chan a zil zo thei hi. Zia ah pat chun Mission chawpna mu in Pawl 10 (Class X) chan Rostad Memorial High School in ala zil thei hi. Class X Candidate Examination ah a failed zia in Kangvai Secondary School ah kichawn in, zia pat chun Guwahati University nuai

ah pawl 10 ala zo hi. 1977 kum in Churachandpur Govt. College ah pat in G.U. nuai ah a graduate hi.

1971 kum in S. Bualkawt M.C.O School ah Evan. Teacher in a sem a, zilna lam ngai pawimaw zia in sem zawm lo in CCPur Govt. College a kai hi. 1983 kum in RMHS ah Graduate Teacher ah pang in kum 16 sung a sem hi. Misson policy tawp zia in EOC (P) ah kichawn lut in January 1, 2008 in Evan. Teacher in a pension tai. A pension nung in Kochuam Upa têtin ahia, October 10, 2010 in Rev. Laldingluaia khut in Kangvai Kochuam Upa ding in namdetna a chang hi.

December 14, 1970 ni hin Pastor Lamzakhai khut in Baptisma a chang hi. January

5, 1984 ni hin Nk. Lamhoi d/o (L) Henzapau tawh Kochuam dan in Suangpha Biakin ah Rev. H. Paukhawkai in ala khutsui a, gil ah ga maljawlna cha pawsal khat (1) leh numei thum (3) a hing ui.

Ama hi lâ lam ah thanuam mi a hi ziak in a umna lamlam ah lapawl hotu'n a pang sek hi. Tonic Sol-fa zilna lam ah Intermediate course, Rev. Roding Pulamte instructor hina'n Intermediate Certificate ala dawng hi.

MALTA TUIKUAL HAW AH KLB No. 132

Zia Lâ hi Kawlhen khua ka um lai, 1975 Beigual tha (September), zan ah Pa E. Paukhawkam te In ah Beigual ka bawlnau ah Thugentu Pa Genkhawpau thugen (Sermon) in ka lungthim/hinna a sukhhak ma ma ziak ah ka phuak a hi. Nasepte chang khatna;

*Malta Tuikual haw ah,
Kanan gamhawi i zawt lai
un;
Thigawpi nasatak in a hung
hang,
Kuang (lawng) kêkzâk in*

*manthaina tung ding a hi
tai;
La kuang tûktanna kha
thathah kin in.*

Sawlchak Paul chu Kaisar âng ah ding ding Italy ah pat Rom Khawpi zuan ah a zin lai in tuipei chung ah thialkâl chuam chuam haw in lawng in a kitawl ua, Malta Tuikual tiang a kitawl ui. Huipei ziak in haksatna namenlo a tuak ui. Zia gual chun ei uh gingtute le Vangam zuan ah ginna lawng ah i zin lai un thepnate, haksatnate leh lau um tamtak i tuak sek ui. I ginna teu hung chau in tummang ziang theina dinmun in i ding chang uh a tam a, ginna det (kuang tuktanna) i mamaw ma ma ui.

Chang nina;

*Tuisuagiat chung ah hin,
Beidawng a khawvak kal
ngakla'n;
Ginna chau tak in chu zing
di'hiu vem?
Bitna ding mualkâng (Sepho)
lam chu i nai tangal ua,
Muang ah i lenna diu' kanan
gam nuam.*

I zinnau khawvel gam ah hin beidawng a lungkham tak ah

HINNA VÂK

i um chang a tam ah, zia phat chuleh, van gam i thangaih ngawi ngawi sek u'i. Ginna chau tak ah bangziak ah um sek i hui em ki-enchain in kiphawchian zel sek hitiu. I tup gam uh chutung pai ta ding i hi ngal ua. Muang ah i lenna diu vangam nuam chu.

Chang thumna;

*Unaute haw hung un,
Bitna mualkâng lam zuan tai
tiu,
Chutilochun, i ginnau kuangte
hi;
Suang kawlawm lak ah
tawllut in um kha tawl'na;
Hun tawpni khawvak hun
ding a nai tai.*

Unaute haw, ginna lawng ah kitawl in van gam lam chu hung zuan ta un. Dan leh soal tuipi ah tum in hukdamlo in um khapal khaitiu. Kumtuang khua hung vakna ding sawt talo ding a hi ngal a.

Thunawn;

*Tui kinawk a sang taluai;
Khua nasatak in a hung thim;
Kuang siatna i tuaklona ding
un
Kuang tûktânna thathak a
hunt a e.*

Khawvel buaina, haksatna tuifawn a sang a, thepnaten nisin ei bawm, ginlana i tuak lona ding un ginna dettak nei zing hun a hi tai.

KHANGLAI HUN MANTAM

Thugentu 12:1

1990 kum ah EOC Khawmpi lian 'KHANGLAI 90' ti minvua ah mang ding ah nasatak ah kisingsakna a chiathakzinglai in, khangdawng lai hun matthiam pawimawna ka lungthim ah a kilat ziak in zia la hi siam a hi.

NUMEI PHA (KLB No. 481)

Prov. 31:10-31

Kum 1992 EOC Khawmpi lian chu 'WCO 92' ti minvua ah mat ding a hi lai in competition item chuam chuam ah kitaisiakna FEMALE VOICE competition lâ ding mahni Kochuam chiat in kingaitua ding ti a hi. Bijang Vaiphei veng Numei Pawl (WCO) ten mawpuakna ei piau a, Numeite, a diak in Nute pawimawna leh phatchuamna ka lungthim ah a hung kilat ziak in, Thupilte bung 31na ah kipat zia lâ hi ka hung siam a hi.

KKP HUANG


New Lamka Bial KKP Choir Night Ni 9th Dec. 2022 Simhaini in New Lamka Pastor Bial KKP in New Lamka biakin ah Choir Night leh Advent Christmas a mang u’i. Zia hun ah Tangphai Provisional Synod Choir tenle chial a hi gual un lapawl hawi tak pani a sau hi.

Zia hun ahin Pu SL Robert Bial KKP Leader in Pathian thu genna a nei hi. Bial sung ah Kochuam Lapawl te le a nuai ah te pat in Pathian pakna la ngaithak a hi:
Nk. Malisa, New Lamka
Tv. Mangminlian, New Lamka
Tv. Lianzamang, Gangpimual
T/Upa Dolianpau, V. Khawnuam



JUMBLE SALE Ni 25th November, 2022 ni’n Imphal Bial sung ah **New Lambulane branch KKP** te’n sum hawlnding in vanlui dawlkhawm in “jumble sale” in ala zuak u’i.

Zia van zawkna hi lawting tak in a nei thei u’i.



Kangvai Bial KKP Advance Khristmas Programme Ni 16th December, 2022 dak 6pm in New Dampi ah Kangvai Bial KKP te chun Advent Khristmas Programme nuamtak in ala mang ui. Zia na ahin Biakna Kikhawp Programme leh Lenkhawp Programme a um hi. Biakna Programme hun in Tv. Malsawm, Bial KKP Leader in Pathian thu genna a nei hi. Zia hun a hin Bial Lapawl ten Pathian pakna la a sau hi. Lenkhawpna hun in Branch tin apat Lapawl ngaithak ahi. Bial Lapawl, New Dampi leh Chawlmunnuam te apat in Special item a nei u’i. Zia hunsung ahin Gift Exchange na le a um hi.



HINNA VÂK

Myanmar ah i Kochuam teu panpina piak

Myanmar ah i Kochuam chanpi teu Outreach Programme ah panpina piak ding KKP General Conference na lemsak chu Bial KKP Puitute, Branch KKP Puitute, Bialtu Pastor te leh Kochuam mipi te panlak na leh kipiak zaw na zia in Myanmar ah ikochuam teu panpi na ding in sum ₹ 2, 03, 885/- CKKP in dawn a hi. Zia sum hi ni 9th December, 2022 in CKKP Committee Memberten Myanmar ah i Kochuam New Moreh Kochuam Biakin ah kimupi in piak daw na nei ahi. Zia panpina hi iKochuam chanpi teu inkuan 103 te chu ₹2, 000/- chiat achan ding un Bialtu Pastor te khut in piak daw a hi. Ziahunahin Rev. Zuankhawmang i/c Tungkyaw Bial, Rev. Thangliansang i/c Nanphalong Bial, Myanmar ah Kochuam mi te leh Moreh Kochuam mi te New Moreh Kochuam Biakin in hun matkhawm a hi. Zia na hin Rev. Lalpiaklian in Pathian thu genna a nei hi.

Zia hun ah ei zintuntu New Moreh Kochuam te chung inle kipiak thu gen a hi.

(A lim hi CKKP Committee Member te leh Myanmar ah i Kochuam mite a hui)



GROUP NIGHT LEH ADVANCE CHRISTMAS MANG **KKP Pengjang** Branch ten ni 19th December 2022 dak 6PM in Sunday School Hall in Group night leh Advance Christmas Programme nuam tak in ala mang ui. Zia hun ahin Sidar leh Olive Group te apat in Group Song, Action Song, Bible Recitation leh Solo te nei ahi. Naupang Sunday School Junior Department leh Intermediate Department te a pat in Choreography le thiam tak in a bawl u'i. Presbyterian Kochuam Thugin apat in Quiz Competition le nei ahi. Chun KKP Member te apat in Solo le ngaithak ahi.



KNP HUANG

3rd December 2022 ni in D. Phailian Bial KNP te'n pauchapkhawmna hun Bible Hill Kochuam Biakin ah ala mang u'i.



Tarik 10/12/2022 (10;30Am-1;00pm)ni in New Lamka Bial KNP ten Pauchapkhawmna hun V. Khawnuam Kochuam Biakin ah ala nei ui.



MYANMAR GAM MISSION NASEPNA REPORTS

Amasa'n a nâ i sep uh i Lalpau Jesu min in Christmas chibai ka hun buk hi.

A chung ah thupi taklat gual ahin, i het zing sau gual ah, Myanmar gam buaina sosang zing in a um a, buaina lak in Lalpa'n a Kochuam te ei veng zing nalai ah, i panlakkhawmna zal un Lalpa'n ga ei suasak zing in, tuchung ah le thagau mangthai a kengbul ah tut thei nalai i hi ziak un ei puitu Pathian leh Kochuam nu leh pate chung in kipak thu ka hun gen u'i.

Myanmar gam buaina ziak ah Kochuamte sum leh pai nek leh dawn buaina tuakte ngaikhawk in CKKP puitute'n i Provisional Synod nuai ah branch leh Kochuam tin apat Myanmar gam panpina thawkhawmte hun keng in New Moreh Kochuam ah vena Inbul khat ah Rs. 2000 In (103) din piakdawn leh pauchap piakna Dt. 9/12/2022 ni'n a hun nei ua, Myanmar ah Kochuamte'n kipak um kasau ah, ka tha uh a muang ma ma hi. Lalpa'n CKKP te leh a hun thawkhawm Kochuam mimal tinte a maljawlna a le tamtak in vuk zing hen ti ka pauchapnau a hi.

Zia panpina chu keng in Kalaymya area lam ah Burmese i Kochuam te kiang in va hawmdawk kawm in Imphal Pastor Bial in a chawp zing uh i missionary teni Evan. Khinmayi leh Evan. Maung Win in Khrista hukdamna chanchinpha mimal mal ah ala genpiakteu khenkhat leh Myanmar gam buai ziak ah, a pawsal kitha piakte, govt. nasepna sunzawm thei talo te leh a chateu tawh mi 16 ni thum sung Pathian thu hilna "Advent Christmas cum Evangelistic camp" ti programme mang in dt. 14-16, December 2022 sung lawp tak in hun mat a hi. Zia camp nah in unau khenkhat mi kipia (contriobutors) te pankhawmna zal in camperte nek leh dawn sutua in Kalaymyo ah Kochuamte'n ei buaipiu a, sum leh pai tha leh zung leh i pauchapna teu

January 2023

kithuakhawm in mi (13) Lal Jesu kengbul ah hun kipialut in Khrista a Lal uh leh hukdampa din kisan in, kihetchianna neite Bialtu Pastor Rev. Thangliansang in Baptisma a chansak ngal hi.

Baptisma change chu anuai ah gual a hiu.

- 1) Mr. Hla Nine - S/O Mr. Aung Ngut - 55yrs
- 2) Mrs. Mah Phyu - D/O Mr. U Nge - 59yrs
- 3) Mrs. Chu Chu Aye - D/O Mr. Phe Khin - 29yrs
- 4) Mrs. Khin Thanda Thwe - D/O Tein Tan - 26yrs
- 5) Mrs. Nin Nin Wae - D/O Mr. Maung Kyaw - 31yrs
- 6) Miss Tet Tha Oo - D/O Tun Min Zaw - 16yrs
- 7) Mrs. Chho Chho Win - D/O Chit Win - 30yrs
- 8) Miss Tan Tan Moe - D/O Maung Chho - 25yrs
- 9) Mr. Sha Mu Lah - S/O Mr. Cin Maung - 15yrs
- 10) Mrs. Phyu Shwe - D/O Mr. Hla Tin - 58yrs
- 11) Mrs. Tin Tin Shwe - D/O Mr. Hla Tun - 34yrs
- 12) Mr. Pine Phyo Tu - D/O Mr. Pho Ta - 11yrs
- 13) Mr. Tu Shin Phyo - S/O Mr. Aung Tan Zin - 10yrs

Lalpa'n sum leh pai ah hung pangte, pauchapna pan hun la zingte leh tha leh zung ah pan hun late haw zosia chung ah a maljawlna taksa lam leh thagau lam in vuk zing ta hen. Amen.

*Report petu,
Rev. Thangliansang
i/c Nanphalong Bial, Myanmar*